



partii naleraq

UPA 2017/127-01

28.04.2017

Folkehøjskolerit pillugit Inatsisartut inatsisaata allangortinnissaa pillugu Inatsisartut inatsisaat nr. xx xx xx 2017-meersoq.

(Ilinniartitaanermut, Kultureqarnermut, Ilisimatusarnermut, Ilageeqarnermullu Naalakkersuisoq).

Folkehøjskolerit pillugit Inatsisartut inatsisaata allangortinnissaa pillugu Inatsisartut inatsisissaattut siunnersuut Partii Naleraq sinnerlugu imannak oqaaseqarfigissuarput.

Folkehøjskolerit, tupinnaraluartumik ukiuni makkunani nunatsinni namminiilivinnissaaq pillugu naalakkersuinikkut anguniagaqaruttulernitta nalaani, inatsisit allangortinniarneqarneranni suli nammineq oqaatsitta tamakkiisumik atornerqarsinnaannginnerat allangortinneqartariaqartoq Partii Naleqqamiit piumasaraarput.

Tassami pissusissamisuuinnartutut isigineqartussaasutut takorloorneqartussaanngikkaluarmat, nunap suulluunniit namminiilivikkusuttup nunagisami inuisa oqaasiinik pingaartitsineq !

Taamaattumik Naalakkersuisunut inussiarnermik kaammattuutingaarput, oqaaseq “folkehøjskolerit” kalaallisut taajuuserneqassasoq, allallu nunami allamiut oqaasi ileqquliutiinnarlugu oqaatsitsinnut akulerullugit atornerqartartut sapinnisamik kalaallisut oqaatsitsinnik taarserneqarnissaat pimooruteqqullugu.

Atuarfiit pineqartut “Inuiaat ilinniaqqiffiisut” taaneqartalissasut matumuuna siunnersuutingaarput, taannalu siunnersuut neriuppugut ataatsimiititaliami eqqartorneqarluassasoq. Soorunami kalaallisut oqaatsivut atorlugit allanik siunnersuuteqartoqarsinnaanera aamma eqqartueqataaffigisinnaavarput.

Taama kalaallisut oqaatsitta aamma inatsisiliornermi illersorneqarnerunissaat qisuariaateqarfigilaariarlugu, inatsisissatut siunnersuut imannak oqaaseqarfigissuarput.

Partii Naleqqamiit iluaraarput, “Inuiaat Ilinniaqqiffiat” nalinnaasumik peroriartuutaasumik ilinniartitsinerup iluani, ilinniartitsissutit ataasiakkaat imaluunniit ilinniartitsissutit ataatsimoortut,

taakkunungalu ilanngullugit, timersorneq, nerisassiorneq imaluunniit ilinniartitsissutit sullivilinnut sammisut ilinniartitsissutigineqartussaammata.

Aamma meeqqat atuarfianni inaarutaasumik naliliinerup ilaanik ingerlatsinissaq siunertaralugu, tamatumunnga ilanngullugit inaarutaasumik misilitsinnerit, ilinniartitsinerit ilinniakkanut ingerlaqqiffiusinnaasut allat, inuutissarsiutinik tunngaviusumik ilinniartitsinerup iluani iliartitsineq aamma ilinniarnertuunngorniarfimmi ilinniartitsissutit ilaat ataasiakkaat ilanngullugit ingerlanneqarsinnaanerat taperserparput.

Naggataatigut Partii Naleqqamiit kaammattuutigaarput ”Inuiaat Ilinniarfiannik” angalasumik pilersitsisoqarsinnaanera eqqartorneqarluni nalilersorluarneqassasoq.

Taama naakkaluamik oqaseqarluta inatsisissatut siunnersuut tunngaviatigut taperserlugu suliap aappassaanneerpeqannginnerani ilinniartitaanermut, kulturimut, ilisimatusarnermut ilageeqarnermullu ataatsimiititaliami suliarineqarnissaa inassutingaarput.